




Botikak aurrerantzean % 4 merkeago izatea espero dute.

XOUSE SIMAL

Madrilek, dekretuz, bi puntu jaitsi ditu botikarien irabaziak

Sendagaiak % 4 merkatzea espero du Espainiako Gobernuak

Espainiako Gobernu-ko Ministro Kontseiluak farmazien irabazi marjinak murrizten dituen dekretua onartu zuen atzo. Horren bitartez, botikariek bi puntu gutxiagoko irabazia izango dute, eta puntu bat gutxiagokoa banatzailleek. Modu horretan, botikaren prezioa % 4 inguru merkatzeko asmoa du Gobernuak.

Agentziak / Madril

ORAIN arte farmaziek botikaren prezioaren % 29,9 bereganatzen zuten irabazi modura. Datorren hilabetetik —orduan jarriko da indarrean dekretua— irabazi alde hori murriztu egingo da, bi puntu murriztu ere. Banatzaillearen irabazia, berriz, % 11koa izango da hemendik aurrera. Bi dekretu horiek direla medio, botikak % 4 inguru merkatzea espero dute, eta hartara Espainian

botiketan egiten den gastu handia 30.000 milioi gutxitzea.

Pentsatzekoa zenez, farmazialariak ez datoz bat atzo onartutako dekretuekin. Haien arabera, «neurri inposatzailea da, osasun arloaren krisia inondik inora konpontzen ez duena». Pedro Capilla Espainiako Farmazia Kolegioetako Kontseilu Nagusiko lehendakariak atzo azaldu zuenez, eurak prest agertu dira irabazien zati bat uzteko, baina ez datoz bat murrizketa dekretuz agindu izanarekin. Farmazialarien arabera, murrizketen ordez osasun arlorako politika orokorra behar da, besteak beste, hezkuntza, eta lehen mailako hezkuntzaren hobetzean oinarritutako dena.

Kontsumitzaile elkarteek, ordea, oniritzia eman diete neurrioi, hala ere, ez direla nahikoa zehaztu dute. Espainiako Kontsumitzaile Elkartearen (UCE) arabera, 1987. urtetik 1995era 250.000 milioitik 700.000 milioira igo da botiketan gastatzen den dirutza, % 200 ia. Hala eta guztiz ere, botiketan ontzi edo kaxak % 15 baino ez dira gehitu; horrek erakusten du, beraz, pre-

zioa izan dela ido dena, eta kontsumoa ez dela hainbeste igo.

Neurri gehiago hartuko dira aurki

• Botiketan egiten den gastua murrizteko beste neurri batzuk ere baditu pentsaturik Gobernuak, datorren astelehenan onartuko duen osasun araudian biltzen direnak. Besteak beste, botiken marka zehatzak errezetatu beharrean jenerikoak gomendatzea proposatzen dute (patenterik ez duten gai arruntak, azido azetilsalazilikoa esate baterako). Botikaren prezioa zehaztea ere aurreikusi dute, eta kontsumitzaileak marka zehatz bat nahi izanez gero aldea berak ordaintzea.

Inaki Azkuna Eusko Jaurlaritzako Osasun sailburuak babes- tu egin zuen atzo botikaren marjina gutxitzeko neurria, eta botiketan gastua murrizteko neurri gehiago hartzearen aldeko agertu zen. Azkunaren irudiko, baleko neurriak dira erreferentzi prezioak zehaztu eta gai jenerikoak errezetatzeara, baina horrezaz gainera herritarrak eta medikuak kontzientziatu egin behar dira.

Azkuna: «Hobetu egin behar da EAEko osasun sistemaren gestioa»

EUSKO JAURLARITZA-KO Osasun sailburu Iñaki Azkunak, Euskal Autonomi Elkarte (EAE) osasun sarearen iazko jardunen balantzea egin zuen atzo Gasteizen. Herritarrak osasun sare publikoari gero eta gehiago eskatzen diola esan zuen Azkunak, eskaera etengabe igoen ari dela, eta, ondorioz, ezinbestekoa

dela osasun sistemaren gestioa hobetzea eta berantolatzea.

Hain zuzen ere, Eusko Legebiltzarra Osasun Arloaren Antolaketarako Legea tramitatzen ari da, eta bitartean Osasun Saila lege hori garatuko duten agiriak lantzen ari da. Osasun zentroen autonomia handitzea da egitasmoaren ardatzetako bat. Bide horretatik,

eritxe bakoitzak bere balantze ekonomikoa egingo luke.

Edonola ere, Osasun Sailak zorrik gabe amaitu zuen iazko urtea. 228.000 milioi pezeta gastatu zituen (9.120 libera inguru), justu aurrekontuetan jasotzen zena. Horren ildotik, azken urteetan Autonomi Elkarteak osasun sare publikoaren gestioa as-

ko hobetu dela nabarmendu zuen Azkunak, baina oraindik, gehiago findu behar dela. Araba, Bizkaia eta Gipuzkoako eritxeetan iaz 181.055 ingreso izan zen, aurreko urtean baino % 4,7 handiagoa. 1990etik 1996urtera, berriz, bi-koiztu egin da ebakuntza kopurua (68.788 egin ziren 1990ean eta 131.894 1996an). X

Goierri ezagutzeko lau ibilbide gidatu prest

■ Eskualdeko ekonomiaren dibertsifikazioa bultzatu nahi dute turismo ekimen horrekin

Jone Larrañaga / Donostia

GOIERRIREN garapenerako Goieki fundazioak, Gipuzkoako Diputazioarekin eta Eusko Jaurlaritzarekin lankidetzan, turismo egitasmo berria jarri du martxan, eskualdea ezagutarazi eta bide batez inguruko ekonomiaren dibertsifikazioa lortzeko. Goierri duen ondare natural eta kulturalaz baliatuz, eskualdean barrena bisita gidatuak antolatu dituzte.

Egistamo horren berri atzo eman zuten Donostian Goieki-ko arduradunek, Guillermo Etxenike Ekonomia eta Turismo diputatuak eta Rosa Diaz Turismo eta Merkataritza sailburuak. Juan Manuel Barandiaran Goiekiko zuzendariak azaldu zuenez, eskualdearen garapenari buruzko plan estrategikoaren barruan sartzen da ekimen hau. Izan ere, plan horrek bi erronka nagusi biltzen ditu bere baitan: Goierri hain garrantzitsua den jardue- ra ekonomikoari eustea batetik, eta zirkuitu ekonomiko berriak sortzea bestetik. Helburu horri jarraiki eratu da eskualdean

Goitur izeneko turismo elkar- goa, eta hark egindako lanaren emaitza da atzo aurkeztu zituzten lau pakete turistikoak.

Lehenengoan, Aizkorriko parke naturala ezagutzeko aukera eskaintzen da; eta bigarrenean, berriz, Aralar eta bereziki on Joxe Miel Barandiaranen ikerketa lekuak ikusteko. Hirugarren ibilbidea, Goierriko herrietako parte zaharra erakusteko prestatu dute, eta laugarrena nekazal inguruak.

Rosa Diez Jaurlaritzako Merkataritza eta Turismo sailburuak ekimenaren garrantzia azpimarratu zuen atzoko aurkezpen ekitaldian, «turismo gune tradizionala ez den eskualde batek sektore hori bultzatzeko plan estrategikoa diseinatu» duelako, eta, batez ere, «oraindik behar ez zenean bultzatu duelako». Diezek gogora ekarri zuenez, eskualde gehienetan jada beste ekonomi arloek gehiago ematen ez dutenean erabakitzen da turismoa bultzatzea. Goierri, aldiz, industria oso indartsua den arren eskualdeko baliabide turistikoak indartzea erabaki dute. X

Gizarte Eskubideen Ituna sinatu du Nicolas Redondok

■ 30.000 sinadura biltzea dute helburu

Efe / Bilbo

POBREZIA eta Langabeziaren Aurkako Elkartasun Plataformak bultzatzen duen Gizarte Eskubideen Ituna sinatu du Nicolas Redondok, UGTko idazkari nagusi ohiak. Eusko Legebiltzarreko Mahaia tramitera onartu du Gizarte Eskubideen Ituna aldarrikatzen duen legez besteko proposamena. Parla- mentuak berau eztabaida de- zan lortzeko behar diren 30.000

sinadurak biltzen ari dira ekimenaren bultzatzaileak.

Langabeziak eragiten duen bazterketa sozial kronikoari aurre egin eta herritar guztiei dagozkien eskubideak garrantz- atzea du helburu Gizarte Es- kubideen Itunak. Nicolas Re- dondoz gain, aurretik Pello Ruiz Cabestanyk, Mariano Ferre- rrek, Joserra Garziak, Andoni Egañak, Alfonso Sastrek eta Arantxa Camposek ere, besteak beste, sinatu dute ituna. X

MIKEL LIZARRALDE



Laudio Ikastolakoak EGUNKARIAN

Laudio Ikastolako ikasleak izan genituen ostegunean gure artean. EGUNKARIA ikusi nahi zuten komunikabideei buruz gehiago jakiteko, eta eguneroko lana nolakoa den ikusteko. Teletipoak, telefonoak, fotolitoak eta bestelako elementuak ezagutu zituzten eta gehienek eskuan fotolito bat zutela utzi gintuzten. Eguna, ordea, ez zitzaion horrekin amaitu, artean errota bat ikustekoak ziren eta.